

[Augsburg], 2. August 1563

An Johannes Oporinus

UB Basel, Fr. Gr. I 11, fol. 263r-v.

Steinmann Nr. 755.

Druck: Gilly, Manuskripte S. 16 (Auszug).

Lit.: Steinmann S. 105, 107.

S. P. D. 28 Iulij, 14 paginas Officiorum vnà cum tuis literis paulo humanioribus, aut potius ἦττον μεμψιμοίροις accepi, laetus ea de causa, quod voluntatem meam boni consulis, cui pares non esse facultates tandem intelligis, nec commodis tuis obstare cessationem meam, sed fortunam temporum, atque etiam vtriusque nostrūm.

M[arcus] et Ioannes Fuggeri nunc absunt: quando redituri, incertum. Occasionem exequendi mandata tua et commodis tuis seruiendi, non negligam.

D. Villingerus, curauit, opinor, vt 80 f. acceperis. Editionis formulam a me praescriptam probat, Nempe

1. vt Suidas Latinè tantum edatur. 2. folio vsitato. 3. charactere grandiusculo, cuiusmodi est Zonarae. 4. diuisis columnis. 5. vt ad pascha proximum absoluatur.

Ego quanquam et valetudine et negotijs saepius quam vellem impedit: tamen iam de folijs 400 seu paginis integris 200. folia 160 conuerti, vt folia conuertenda restent 240. quae diebus 120, adiuuante deo, id est, mensibus ad summum 4. conficiam. vt ad Cal[endas] Decembbris totum opus absolutum habeas. Semissem operis, si voles, Francofurtum tibi mittam. Sed potius esse videtur, vt redditus è Nondinis tuus expectetur, Nisi forte te absente impressionem inchoandam censes.

Vel occupatio tua vel cessatio in confiendo Bibliothecae tuae iudice, me nihil agere patitur de tuis commodis, quae mihi, credas velim, aequè exoptata sunt ac tibi. Sed primum mihi conferendus erit index. 2. aestimatio librorum consideranda. 3. agendum cum magistratu. Cui si tecum conuenerit: tum demum de libris huc mittendis, et pecunia tibi numeranda, erit agendum. Sed priusquam haec conficiantur: quid possim vides: quid optem, ego scio. Polliceri nihil possum praeter fidem et diligentiam. Sed si res successerit: operam dabo, vt etiam ante libros huc missos, Francofordiae aliquot aureos (numerum dicere non possum) accipias. Tuum erit curare, vt ante nondinas indices habeam cum aestimatione, eaqué non mercatoria, sed typographicā. Nam qui eos indices quos adhuc habeo, viderunt: de precio queruntur. Retineo et impressos indices, dum totius Bibliothecae descriptionem accepero. Valde metuo ne breuitate temporis, quo minus tibi satisfiat, excludamur. Longi enim subsellij tarda sunt responsa, et summa atque incredibilis non ἀκρίβεια sed λεπτολογία, quam docet ὁ ἐριούνιος ἔρμῆς, quem nobis propicium precor.

Castigationes officiorum, et indicem eorum quae misisti hactenus, ad numerum scilicet 336. mitto. Reliqua tu curabis, vt licebit. Vereor vt possis ad Cal[endas] Septembbris absoluere, nec vrgeo. Sed hoc abs te peto, vt 60 exempla cum absoluta fuerint, prima quaue occasione mihi mittas. Id enim mea permultum interest. Rogauit etiam bis, et iam tertium oro, vt φιλοτιμίαν meam iuues. Cupio enim omnibus editionib[us] mearum lucubrationum nouam hanc Bibliothecam nostram donare. Etsi autem nuper paulo secus scripsi, tamen nunc certis de causis aliquid amplius peto, nimirum haec.

1. Demosthenem Latinum in folio. 1. in octaua. 2. Venetae editionis.

1. Isocratem in folio. 1. graecolatinum. 2. Lutetianae editionis. pro quibus tibi satisfaciet Hillerus in nondinis.

Mitto tibi προσθήκας Officiorum, versus in meam laudem conscriptos, et 2. μελέτας auditoris mei, quas certis de causis, si tempus pateretur, in fine operis adijci cupio. Sin minus: asseruabis ad Suidam. Praefationes meas habes. Sed ne idem vsu veniat, quod olim, easdem denuo tibi mitto, quarum primam ad senatum grandi et ornato charactere velim excudas. Quid verò si id tibi quoque commodet? Non enim desunt et ingenij et doctrina praestantes viri, ijdemqüe et φιλοπάτριδες et φιλότιμοι.

Cos. Hainzelius tibi gratias agit de missis libris, et S[alutem] P[lurimam] D[icit]. Spero me effecturum, vt eius nomine in Nondinis 100 f. mutuos intra biennium vel libris vel nummis soluendos accipies. Sed nihil polliceor, nisi studim meum, etsi penè hoc confecisse videor. A Stetensi minus expectato quam ἀπὸ δρυὸς ή ἀπὸ τέτρης, qui si non iuuaret, ferendum. Vtinam suis sermonibus non noceret, actum de te esse suspicans. Hoc tibi. noui enim te quicquam ad illum. Satis est te nosse, quid de illo sentiendum. Ego inimicijs talium non delector, amicitias non curo magnopere. Corneri σύνοψιν nuper tibi missam, quo loco videbitur, addes meis annotationibus, in fine praesertim lib[ri] I. ad quem illa pertinet, aut totius operis. Sed si te augustiae temporis impediunt: et προσθήκας et Indices, et Castigationes (quanquam hae vna diecula possunt addi) omittito, modò sine praefationibus liber non edatur. Vale Mi D. Oporine et κεφαλαιωδῶς ad haec respondeto, sicut ego ἄνευ προοιμίων καὶ παθῶν ad te scribere soleo. Postridie Cal[endas] Augusti. 1563.

Hiero[nymus] Wolfius
Tuus.

Cum haec scripsisset: Ioannem Fuggerum redijsse cognoui, sed et tempestate et vespertino tempore non conueniendum illum, fessum fortassis et occupatum, existimau. Illud etiam veniebat in mentem, admonitos fore exactores. οὐ γὰρ προετικοὶ χρημάτων εἰσὶ, τοῦ πατρὸς ἴσως οὐ πολλῷ ἐπιεικέστεροι ὄντες. Mihi quidem si auscultarent, 300 istos aureos pro dedicatione tibi donarent. ἐγὼ δὲ ἦτον τοῦτο πιστεύω, τοῦ ἀρχιερεὺς ἐν ῥώμῃ γενέσθαι. Si quid abs te petitum fuerit: pro tua prudentia illis aut solues, si poteris, aut respondebis. Iterum vale.